

АКАФИСТ СВЯТОМУ БЛАГОВЕРНОМУ ВЕЛИКОМУ КНЯЗЮ МИХАИЛУ ЯРОСЛАВИЧУ, ТВЕРСКОМУ ЧУДОТВОРЦУ

Кондак 1

Избранный Богом из земных князей в небесное пресветлое мученическое воинство, от земных сея юдоли в Царство Небесное преселился еси: положил бо еси душу твою за люди твоя. Темже, яко имеяй дерзновение ко Господу, моли за державу Российскую, за град твой и люди, тебе зовущия: Радуйся, благоверный княже Михаиле, Тверский преславный чудотворче.

Икос 1

Ангелов и вся твари Создатель, ангелонравна тя провидев и воителя за Христа непобедима, архистратигу небесных воинств тезоименне тебе нарешися благоустрои. Темже славяща Божие о тебе промышление, яко избранну сосуду Христовы благодати, вопием ти: Радуйся, равноапостольнаго Владимира благословенная отрасле; Радуйся, благоверных и благочестивых Ярослава и Ксении чадо. Радуйся, яко во утробе матери осиротев, всех Бога во отца место обрел еси; Радуйся, яко под кровом крил Его премудростию и возрастом преспевал еси. Радуйся, яко отроча доброумно и благонравно был еси; Радуйся, яко от юности твоя паче всякаго сокровища Христа возлюбил еси. Радуйся, яко от Бога и человек достойне возлюблен был еси; Радуйся, благоверный княже Михаиле, Тверский преславный чудотворче.

Кондак 2

Видевши тя благоверная мать твоя Ксения, яко Анна Самуила, преспевающая возрастом и премудростию, страхом Божиим и всеми добродетельми украшаема, радовашеся о тебе, благодарно поя премудрости наставнику и смысла подателю Богу: Аллилуиа.

Икос 2

Разум богомудрый имея, яко Соломон, всем сердцем возлюбил еси, блаженне, премудрость Божию, юже и поискал еси прилежно от юности твоя; темже от Бога дарование прием, храмозданием Царю премудрому поревновал еси. Сего ради славяще, зовем ти: Радуйся, яко храм прекрасен Преображения Господня воздвигл еси; Радуйся, яко от имений твоих щедро оный украсил еси. Радуйся, яко всем сердцем благолепие дому Божия возлюбил еси; Радуйся, яко пребывати в нем паче всех утех мирских изволил еси. Радуйся, яко и сам храм Божий живой, духовный был еси; Радуйся, молитвы бо твоя, яко кадило благоухонное, Богу принесл еси. Радуйся, зане усердие молитв и дел твоих, яко всеожжение тучное и жертву непорочную, прият Господь; Радуйся, яко и ныне паче

злата многоценнаго святыя мощи твоя украшают церковь сию. Радуйся, благоверный княже Михаиле, Тверский преславный чудотворче.

Кондак 3

Сила Вышняго осени тя, и Дух Божий ношашеся над тобою, якоже над Давидом, егда возведе тя Господь на прародительный престол великим князем славнаго града Владимира. Темже священно-начальницы и князи, и вси людие согласно радовахуся, благодаряще Бога, возносящаго смиренныя Своя, и поюще Ему: Аллилуиа.

Икос 3

Имея душу боголюбиву и сердце милостиво, егда власть приял еси великокняжую, не изменил еси нрава твоего смиренномудраго и любвеобильнаго: потщался бо еси всяку слезу отъяти от лица страждущих и был еси всем в нуждах помощник. Темже не остави и нас, надеющихся на тя и вопиющих таковая: Радуйся, святителей и священников любителю и богомудрых иноков собеседниче; Радуйся, вдов и сирот питателю и обидимых заступниче. Радуйся, отроком и юношам чистым житием твоим благочестия и целомудрия учителю; Радуйся, старцев и убогих пристанище, и недугующих и страждущих упокоителю. Радуйся, добродетельми паче, неже порфирию и виссом, украшенный; Радуйся, благочестием паче многоценныя диадимы увенчанный. Радуйся, благоверный княже Михаиле, Тверский преславный чудотворче.

Кондак 4

Бурею властолюбия обуреваем, князь Георгий ласканием и дарами испроси себе у хана великокняжение Владимирское; ты же, смиренно-мудре, отдав тому законное твое владение, во отеческий град Тверь отшел еси. Не хотя бо пролития крове христианския, дело твое Богу, судящему праведно, предал еси, воспевая Ему: Аллилуиа.

Икос 4

Слышав, яко сродник твой, неудовлился отъятием у тебе великокняжения, в пределы Тверския со мною ратию татарскою вниде, разоряя обители и храмы, веси огнем и мечем истребляя, и Богом врученное ти стадо распужая и расхищая, яко Авраам, домочадцы твоя собрал еси, и совещався с ними, душу твою за святыню Господню и за люди твоя положити восхотел еси. Сего ради и ныне мы благодарно тебе вопием: Радуйся, княже по сердцу Божию, скорбь твою Богу поведавый; Радуйся, воеводо благоверный и смиренномудрый, печаль твою на Бога возверзый. Радуйся, заповедь Христову, еже возлюбити ближняго, яко себе, дела оправдавый; Радуйся, Моисею и Павлу в ревности о благе и спасении людей твоих поревновавый. Радуйся, во брани не славы земныя, но ограждения святыни Господней поругаемой искавый; Радуйся, буйство татарское силою Божию укротивый. Радуйся, люди твоя от разорения, плена и лютыя смерти

помощию Вышняго оградивый; Радуйся, благоверный княже Михаиле, Тверский преславный чудотворче.

Кондак 5

Боготечная звезда воем твоим явился еси, благоверный Михаиле, предьядя бо пред полки твоими, десницею твоею, Богом укрепляемою, разрушил еси врага и местника. Темже, победив сопротивных. Богу, чудодействующему мышцею высокою, сокрушившему брани и спасшему люди Своя, воспел еси Аллилуиа.

Икос 5

Видевше жителие града Твери и всяя Тверския области Богом данную ти победу преславную, яко царевну Кончаку и злокозненного воеводу Кавгадыя пленил еси, славу и благодарение Богу приношаху и тебе, заступника своего, похвалами венчаша. Темже и мы днесь, победныя почести тебе восписуя, вопием: Радуйся, архистратигу сил небесных тезоимените и подражателю, вражия силы сокрушивый; Радуйся, вождю богохранимый, татарския полчища, яко хананеи, разсеявый. Радуйся, Аврааме новый, благословенный Богом вышним, Иже покори враги твоя под ноги твоя; Радуйся, Давиде российский, оружием благоволения Божия венчанный на земли. Радуйся, княже благоверный и благочестивый, славою и честью превознесенный на небеси; Радуйся, яко даде тебе Господь благословение во век века и возвесели тя радостию неизреченною пред лицем Своим. Радуйся, благоверный княже Михаиле, Тверский преславный чудотворче.

Кондак 6

Проповедник православныя веры явился еси, благоверный княже, пред сыны агарянскими; Христа бо, Сына Божия, едино спасение и утешение человеков быти проповедуя словесы богомудрыми и терпением твоим доблим, ведущих научал еси пети Ему: Аллилуиа.

Икос 6

Возсиял еси во светлостех святых, яко солнце, венцем славы увязен на небеси и нетлением телесе прославлен на земли: веры бо ради Христовы пострадав, Царствия благолепие и венец доброты от руки Господни приял еси. Темже, предстоя престолу славы, поминай нас, похваляющих тя и глаголющих: Радуйся, страстотерпче Христов, во всем житии твоём верный Божий служителю; Радуйся, Бога выну славивый на земли, и ныне ангелом и архангелом сожителю. Радуйся, за труд любве и подвиги благочестия с преподобными и праведными прославленный; Радуйся, за страдания твоя и терпение крепкое мучеником сопричтенный. Радуйся, исповедниче Христов твердый и неустрашимый; Радуйся, помощниче всем пречудный и хранителю от Бога нам данный. Радуйся, молитвенниче о чтущих тя теплый и богоугодный; Радуйся, благоверный княже Михаиле, Тверский преславный чудотворче.

Кондак 7

Хотяй дни видети благи, не мщением, но любовию воздал еси врагом твоим: Кавгадыя бо и иныя пленники с дарми в землю их отпустил еси и, мир князю Георгию даровав, не губити христианы, паче же защищати от поганых увещал еси. Помози убо и нам, святе, стезя мира и любве твоя последовати, да благоприятно Богу мира поем: Аллилуиа.

Икос 7

Новаго тя Иосифа незлобивога и Давида кроткаго разумеваем, богомудре Михаиле: ов бо братьям своим, сей же Саулу мстити за озлобления их не хотяху. И ты убо, имея во власти твоей ищущия погубити тя, не яко пленныя, но яко посетители имел еси их, благотворя врагом твоим. Сего ради, похваляюще тя, вопием: Радуйся, российский Иосифе, от братии твоя измаильтяном на пленение и смерть обреченный; Радуйся, тех злобу не мечем токмо, но любовию укротити поискавый. Радуйся, сеятеля вражды и мщения диавола, яко Давид Голиафа, кротостию и милостию ко врагом победивый; Радуйся, враги твоя пленныя словом утешивый и пищею удовливый. Радуйся, люди твоя, бранию расточенныя, любовию собравый; Радуйся, разоренныя и бедствующия утешивый и благопотребным снабдивый. Радуйся, благоверный княже Михаиле, Тверский преславный чудотворче.

Кондак 8

Странна некая, но прелюбезна Богу и человеком видим о тебе, святе Михаиле. Ведый бо оклеветания врагов твоих и неправду судей твоих, не убоился еси гнева ханскаго; но да сохраниши в мире отечество твое, душу твою положить за люди твоя возжелел еси, взирая на начальника веры и совершителя Иисуса, Емуже и вопиял еси: Аллилуиа.

Икос 8

Всего себе Богу предав, яко агнец незлобивый на заколение текл еси, блаженне; не восхотел бо еси подобитися наемнику, иже оставляет овцы, видя волка грядуща, и бегаёт, но яко пастырь добрый, бежати советующим отвещал еси: аще и сохранит бегство живот мой, но погубит люди моя неповинныя. Темже славяще благоприятное твое о людех попечение, вопием ти: Радуйся, пастырю добрый, Пастыреначальнику Христу подражавый; Радуйся, люди своя паче присных твоих и паче себе самага возлюбивый. Радуйся, вся претерпети, токмо да люди твоя от разорения и напрасныя смерти избавити изволивый; Радуйся, от убивающих тело и немогущих лишше что сотворити не убоявшийся. Радуйся, тленную славу земную ни во чтоже вменивый; Радуйся, вся лестныя советы злочестиваго Кавгадыя презревый. Радуйся, сохранение веры Христовы всем красным и славным мира сего, тебе обещанным, предпочтый; Радуйся, еже пострадати и умерети за Христа, да с Ним вечно царствуеши, предъизбравый. Радуйся, благоверный княже Михаиле, Тверский преславный чудотворче.

Кондак 9

Все естество человеческое кротостию и смирением удивил еси, благоверный княже: злбныя бо клеветы врагов твоих кроткими словесы отвращая, неправду судей ни единым же словом обличил еси, но яко истинный раб Христа Бога, последовал еси Владыце твоему, иже укоряем противу не укоряше, стражда не прещаше, Емуже, судии всех и мздовоздаятелю, и вопиял еси: Аллилуиа.

Икос 9

Витии многовещанныя не возмогут изрещи великаго страдания твоего, стратотерпче: отславше бо врази твои други твоя и присныя, кладу велию на выю твою возложиша, и недовольни суще, яко тяготою клады, гладом, жаждою и хождением многим за ханом днем до истощания тя изнуряху, нощию руце и нозе твои в кладу забиваху, да никоея же ослабы имеши членом твоим. Темже, поминающе подвиги твоя, вопием ти: Радуйся, за веру и отечество твое безчестие претерпевый; Радуйся, бос и гладен, связан и поругаем всеми, яко пленник, за ханом влекомый. Радуйся, псалмопений ради всеночных очесем твоим сна и веждама дремания не давый; Радуйся, в скорби твоей и злостраданиях плачущия бояры и други твоя утешивый. Радуйся, твое утешение в едином Господе и молениях Ему положивый; Радуйся, за грядущая страдания и лютую смерть, ихже провидел еси, Бога благодаривый. Радуйся, благоверный княже Михаиле, Тверский преславный чудотворче.

Кондак 10

Спасти хотя душу твою, яко христианин истинный к смерти себе приуготовил еси. Ведый бо, яко близ есть смерть, при дверех, покаянием теплым и слезным пред отцем духовным душу очистил еси и, приобщением тела и крове Христовы соединився Христу, воспевал еси Ему, всем дарующему живот вечный: Аллилуиа.

Икос 10

Царя нечестиваго повеление испросивше, врази твои послаша воины убить тя, и яко волцы хищницы, яко тигри, жаждущий крове, нападоша злии на тя, агнца незлобиваго, и кладою терзаша выю твою, и главою тя о вежу удариша, и на землю повергше, пястями тя бияху нещадно, дондеже лютейший всех Романец ножом удари в ребра твоя и исторже любвеобильное сердце твое. Темже тебе, яко агнца, за Христа закланного, похваляюще, вопием: Радуйся, яко Авелю, завистию братнею погубленному, уподобился еси; Радуйся, яко венец твой княжеский кровными каплями, яко камением чудным, украсил еси. Радуйся, яко рубище твое, в немже убиен был еси, краснейше багряницы царския златотканная соделал еси; Радуйся, яко сердце твое чисто и смиренно в жертву Христу, за ны пострадавшему, принесл еси. Радуйся, яко мучеником подражавый, лику их сопричтен еси; Радуйся, за Христа смерть приемый, со Христом вечно жити

сподобился еси. Радуйся, благоверный княже Михаиле, Тверский преславный чудотворче.

Кондак 11

Пение благодарственное Господу приносим о тебе чтущии тя, святыи благоверный княже Михаиле, яко дарова Господь нетленное тело твое Тверской области во утешение и ограждение, граду Твери в славу и защищение, скорбящим во утешение, бедствующим во отраду и помощь, болящим во источник исцелений, и всем, верою притекающим к тебе, во спасение. Темже Богу, дивному во святых, вопием: Аллилуиа.

Икос 11

Света невечерняго причастника яви тя Господь абие по преставлении твоём, блаженне, облаки бо светлыми тело твое, лежащее на земли, оградив от зверей дивных, столпом огненным показа тя всем столпа бывша веры и правды, и тело твое нетленно сохранив, чудеса прослави тя. Темже вопием ти: Радуйся, столпе веры, к земли обетования путь нам показуяй; Радуйся, облаче духовный, от бед и напастей люди твоя покрываяй. Радуйся, сосуде благодати, сонмы верных на поклонение мощем твоим привлекаяй; Радуйся, источниче неоскудный, всем приходящим с верою исцеления подаваяй. Радуйся, воеводо непобедимый, якоже в животе, и по смерти враги наша от нас прогоняяй; Радуйся, славо и упование града Твери, в молитвах твоих выну нас поминаяй. Радуйся, благоверный княже Михаиле, Тверский преславный чудотворче.

Кондак 12

Благодать, данную ти от Бога, ведуще, людие града твоего, и поминающе, яко возлюбил еси их в животе твоём даже до смерти, выну к тебе, яко скорому и крепкому помощнику во обстояниях и скорбех, находящих на град, притекаю. И не посрамил еси упования их, скоро от бед избавляя молитвами твоими. Темже Богу, спасавшему и спасающему тебе ради нас недостойных, вопием: Аллилуиа.

Икос 12

Поюще страдания твоя, ублажаем святую память твою, с верою и любовию притекаем к раце мощей твоих, и яко предстояща с лики ангел и со всеми святыми Животворящей Троице, смиренно молим тя: не забуди, княже благоверный, люди твоя, спасай град твой и веси твоя, якоже и прежде, даруй всем, притекающим к тебе, яже к житию временному, паче же к жизни вечней благопотребная. Милостив буди нам, восхваляющим тя недостойными усты и поющим: Радуйся, горняго града достигнувый и град свой земный любовию назираяй; Радуйся, многжды град Тверь от смертоносныя язвы дивно спасаый. Радуйся, со ангелы сликовствуяй и люди твоя в скорбех их не забываяй; Радуйся, с праведными Богу славы предстояй и нас грешных, молящихся ти, не презираяй. Радуй-

ся, благами вечными и неизреченными наслаждайся и лепту вдовицы, тебе zde приносимую, любезно приемляй; Радуйся, на земли и на небеси от Бога прославленный и наша недостойная хваления не отвергая. Радуйся, благоверный княже Михаиле, Тверский преславный чудотворче.

Кондак 13

О предивный во страдальцах, святой благоверный великий княже Михаиле! Призри милостивно на смиренныя рабы твоя и умоли Господа Бога, да сохранит град твой и люди твоя, и вся грады и веси христианския от глада, губительства, труса, потопа, огня и всякаго зла, и дарует всем нам вольных и невольных грехов оставление, да прославльшему тебе Богу поем: Аллилуиа.

(Этот кондак читается трижды, затем икос 1 и кондак 1)